

古蹟(故宮)

經遠通志稿卷十一

第十三冊

綏遠通志稿卷十一

古蹟故宮

漢單于臺

方輿紀要。單于臺。杜佑曰。在雲州雲中縣西北百餘里。漢武
 元封元年。勒兵十八萬騎。出長城北。登單于臺。唐武后永昌
 初。使僧懷義討突厥。行至紫河。不見敵。刻石單于臺。元和志
 云。臺在西受降城東北。

山西通志。單于臺在薩拉齊廳北。元和志云。單于臺在雲中

縣西北四十里。按太平寰宇記作四百二十里是也。志文偶

誤。漢武帝元封元年。勒兵登單于臺。即此。

案臺之所在。通典。元和志。寰宇記。諸書所述皆不同。惟所

指方望尚無大異。蓋雲中之西北亦即西受降城之東北。

也。故山西通志據之。斷為在薩廳之北。然此特就前清時
廳境言之耳。若以今日省縣形勢論。則臺當在包頭或安
北兩縣之北。以此兩縣原均薩廳屬境故也。就上述諸說
揆之。漢之單于臺去紫河尚遠。顧氏紀要引唐僧懷義至
紫河刻石單于臺為證。恐誤。蓋紫河為唐單于府城所在
處。或當時其地別有一臺與此同名。亦未可知。若必強指
為一地。則道里懸殊。其說固難通已。

後魏雲中宮

水經注。白渠水西北逕成樂城北。又西逕魏雲中宮南。又西
南逕雲中故城南。魏土地記曰。雲中宮在雲中縣故城東四
十里。

山西通志。雲中宮在托克托廳東。

案雲中之稱。自漢迄魏。因名同地。復牽混已故。雖名流如胡三省之注通鑑。何義門全謝山。趙一清董祐誠諸氏之校水經注。其於雲中定襄盛樂諸故城。亦皆苦其混亂而不能作精確之剖析。實則雲中盛樂二故城之南。各有一新城。詳見故城故都各條。惟此雲中宮則適位於兩故城之間。西去雲中東去盛樂皆四十里。故山西通志斷為宮在托克托廳東良是。

後魏盛樂宮

魏書帝紀。昭成帝建國三年。移都於雲中之盛樂宮。

案此盛樂宮。即雲中故城之宮。非定襄故城之盛樂也。山西通志謂在和林格爾廳北。殊謬。蓋和林縣北乃定襄之盛樂。與雲中之盛樂宮無涉。雖後漢時定襄之盛樂嘗改

隸雲中郡。但至後魏之世。其稱謂已自不同。况史文明言移都於雲中之盛樂。此正謂自定襄之盛樂移去耳。豈有仍在和林縣北之理。餘詳故城條。

後魏豺山宮

魏書帝紀。太祖天興六年七月。北巡。築離宮於豺山。縱士校獵。天賜三年正月。北巡。幸豺山宮。校獵。至屋孤山。四月。幸豺山宮。遂登定襄角史山。八月。幸豺山宮。遂至青牛山。五年正月。行幸豺山宮。遂如參合陂。是年蠕蠕犯塞。入至參合陂南。至豺山及善無北澤。

山西通志。案以魏書帝紀中所歷之地參考之。豺山當在寧遠廳南。

案寧遠廳即今涼城縣。其南近邊牆處有山。或即古之豺

山歟。

後魏阿計頭殿宮城

水經注。白道中溪水發源武川北塞中。其水西南流。歷谷。逕魏帝行宮東。世謂之阿計頭殿宮城。在白道嶺北阜上。其城圓角而不方。四門列觀。城內惟臺殿而已。

山西通志。阿計頭殿在歸化城廳西北。

案白道嶺在今歸綏縣北。而中溪水則在縣西北數十里外。山西通志以水經注有水逕行宮東之語。遂斷為殿在歸化城西北。殊不知中溪水之出谷處。雖在城西北。而其發源固遠在東北也。故酈氏述此水於逕行宮後。復繼之曰。其水又西南。歷中溪出山。可知殿之在水西。乃指上游處。非其出山處。况注文明明謂在白道嶺北阜上。又何得

拘於流水。而易其方位哉。且即就交通道路論。此殿亦當在白道嶺北。

後魏廣德殿講武臺

魏書帝紀。太平真君三年六月。南秦王楊難當朝於行宮。先是起殿於陰山之北。殿始成而難當至。因名曰廣德焉。水經注。塞水南流。逕廣德殿。山下。余以太和十八年從高祖北巡。屈於陰山之講武臺。臺之東有高祖講武碑。自臺西出。南上山。山無樹木。惟童阜耳。即廣德殿所在也。其殿四柱兩夏。原註夏堂。宇綺井。圖畫奇禽異獸之象。殿之西北。便得焜煌堂。雕楹鏤楠。取狀古之温室也。其時帝幸龍荒。遊鑿朔北。南秦王仇池楊難當捨蕃委誠。重譯拜闕。陛見之所也。故殿以廣德為名。太平真君三年。刻石樹碑。勒宣時事。碑陰題

宣城公李孝伯尚書盧遐等從臣姓名若新鏤焉。

山西通志廣德殿在薩拉齊廳東北。

案塞水即今萬象溝中水自前清至今皆屬歸綏轄境廣德殿既在水東則當云在歸化廳西北不當言在薩廳東北也。即就距離論亦以去歸綏為近。雖歸綏之西北即薩縣之東北然使後之考古者於薩縣境內求之終難免有毫釐致謬之歎。故山西通志之推斷不可不稍加訂正。庶幾廣德殿之遺址雖不可見而其地位方望之所關猶可髮方髯得之不至甚謬云。

後魏方山宮一名靈泉宮

方輿紀要北魏主宏屢如方山為其母馮太后營壽陵又於方山南起靈泉宮引如渾水為靈泉池東西百步南北二百

步是也。又北苑亦在其地。魏史太和元年。於苑中起永樂遊
觀殿。穿神淵池。胡氏曰。方山在平城北。如渾水上。志云。山頂
有拓拔魏二陵及房山宮遺址。

案方山或謂在今大同縣轄境內。因顧氏方輿紀要謂在
大同府北五十里故也。然考嘉慶重修清一統志云。右翼
牧廠。漢疆陰縣地。明為大同府邊外。方山在牧廠西二十
里。土人名敦爾白喀喇山。按大同與本省豐鎮縣以邊牆
為界。此山既在邊外牧廠地。則其為豐鎮轄境無疑。况胡
氏亦謂山在如渾水上。而此水又實以豐鎮為上游。是非
其屬於本省之又一明證乎。至顧氏五十里之說。或係依
古籍漫紀之。而不知今之大同城乃明初所建。非復北魏
平城故址。道里不符。亦固其所。

後魏柞嶺壇

魏書帝紀。世祖始光四年七月。築壇於柞嶺。戲馬馳射。方輿紀要。魏主燾始光初。命長孫翰等伐柔然。自將屯柞山。亦曰柞嶺。是年燾破夏統萬。引兵還至柞嶺。即此。山西通志。柞嶺壇在清水河廳西。

案歸綏識畧謂柞山即薩拉齊西北之五當谷。然亦不過就谷中所產之杉。有似於柞。而聊為推測之詞。究亦無可指實也。今若就北魏時伐統萬往返途徑揆之。其凱旋之兵。似無迂道北行經五當谷之理。自以山西通志之說為是。

後魏馬射臺

魏書帝紀。太宗永興二年五月。車駕幸參合陂。七月。立馬射

臺於陂西。講武教戰。世祖始光三年七月。築馬射臺於長川。帝親登臺走馬。

山西通志。北魏馬射臺一在寧遠廳北。一在豐鎮廳東北。

案山西通志所述。蓋謂參合陂西之臺在寧遠。長川之臺在豐鎮也。其方向皆以廳治為準。與今縣治同

後魏九十九泉石亭

魏書帝紀。太祖天賜三年八月。西登武要北原。觀九十九泉。造石亭。

山西通志。九十九泉石亭在寧遠廳界。

案九十九泉。為北魏時皇帝遊幸名勝之地。今已莫能指實。其沿革方望。見山脈武要北原條。說者謂北原即今之奎騰梁。泉當在其附近處。惟御造石亭。則無蹟可求久矣。

隋榆林宮

清一統志。榆林宮在勝州舊城中。元和志。隋榆林宮在州城內。煬帝大業三年置。因榆林郡為名。後煬帝北巡。陳兵塞表。因幸此宮。突厥啟民可汗獻馬及兵器新帳。因賦詩云。

案榆林宮僅見於元和志。而清一統志引其文。他籍雖間有述之者。要未能較此為更詳也。茲特錄此一節。以著其概。餘可參閱故城勝州條。

隋萬壽戍

方輿紀要。萬壽戍在朔州北塞外。隋大業四年。詔以突厥啟民可汗奉化。宜於萬壽戍置城造屋。或曰萬壽戍即啟民牙帳。煬帝幸此。因名。

案萬壽戍既以戍名。似不當輯在故宮之列。惟我國自秦

漢以來。萬壽萬歲等字已沿為頌揚帝王之專詞。此戍置城造屋。既為可汗建牙之所。復以煬帝臨幸而獲萬壽之稱。則其所謂屋者。亦宮之類也。其確址今無可考。或在古金河附近處。

清聖祖御營

采訪錄。清聖祖御營。在武川縣西北二百八十里喀爾喀右翼旗所屬貝勒廟西山口之北坡上。累石為垣。方不踰百步。殘基高可二三尺。中有土壇。似是當年黃幄駐紮處。相傳謂此即清初聖祖仁皇帝御駕親征噶爾丹時宿營所留之蹟。俗呼為康熙營盤云。

案清康熙三十五年征噶爾丹時。御駕確嘗至歸化城。此在清代史志中固多有述之者。然則行軍由歸化踰白道。

嶺。而經貝勒廟附近。亦為極合情理之事。不足異也。爰采錄之。以著一代巡幸駐蹕之蹟。

清萬壽宮

綏遠旗志。綏遠城全圖載萬壽宮在城內彌羅閣東道北。又萬壽宮圖載宮凡三進。其最後一院有前後殿各一層。前殿正中供金漆雲龍萬歲牌。

案綏遠城建於清雍正十三年。至乾隆二年工竣。此宮蓋亦同時所成也。當前清之世。每值朔望或聖節忌辰之日。則駐防將軍率全城旗員詣宮行九扣禮。謂之拜龍牌。大抵各省會或較大之滿洲城皆有此宮。所以備遠臣抒誠祝聖之地。蓋一朝之通制也。逮入民國。此禮已廢。今就宮址。改建為教育廳。掃獨尊之殘燄。成普利之宏規。輪奐一

新觀瞻迥異曩日矣。

↑ 附錄

周太祖隋文帝先世故宅

山西通志周太祖故居在歸化城西北又有楊忠故宅舊通

志魏天興初遷豪傑於代郡宇文陵隨例徙居武川遂為武

川人陵曾孫即周太祖案舊志改武川為周保定三年楊忠

為元帥與突厥伐齊出武川過故宅祭先人享將士

案宇文陵楊忠雖為周隋皇族之祖要未及身稱帝故別

錄之以附於宮殿之末餘有同類者均仿此

清公主府

采訪錄公主府在歸綏縣治北郊距城五里許相傳清初外

蒙古喀爾喀某部之貝勒以軍功進爵封親王並奉特旨選

尚某公主。既而公主下嫁。將適喀爾喀。行抵歸化城。不願北去。乃奏請於城北劃界修府。得旨俞允。遂留居焉。厥後公主既沒。額駙之裔仍返外蒙。以世僕留管府務。有大事則馳傳請命。迄於清末不改。府凡五進。正寢旁舍園圃樓臺悉備。後枕青山前臨碧水。建築與風景之佳。為一方冠。昔之覽者多謂府之規模比之舊都宮禁蓋具體而微云。民國十三年秋。省立第一師範學校因校舍毀於淫雨。乃遷入府中。嗣累年增葺改建。已漸異舊觀矣。

案公主事跡在清人著述中甚詳確之紀載。當世所知率多得諸傳聞。惟朔平府志謂阿附策倫敦篤其先係喀爾喀部長。聖祖仁皇帝康熙年間來歸。賜住歸化城大青山前。建府尚四公主。復以近邊一帶田地為湯沐邑。自殺

印之民
印之民

孔改

虎口開邊民耕種田禾豐收商賈輻輳絡繹不絕地方稱
極盛焉。又據舊說公主初來嘗暫居於清水河嗣乃遷住
歸化城築邸於城西北隅近河處三遷始居北郊新府其
近河舊邸後遂改為歸化典獄巡檢署清末署廨雖已頽
敝而龍鳳之瓦雕石之礎猶灼然可覩迨入民國因其殘
毀已甚爰即其地改建警察廳即今省會公安局址也。又
考公主下嫁額駙曰德貝子外蒙古車臣汗部人公主因
愛歸化水草豐美乃不肯去額駙則半年居府半年駐旗。
~~民~~清之際庫倫要人有綉貝子者名綉楚克車林自謂即
額駙德貝子之裔也。至於公主何名品居何級今已無能
詳說者惟清水河民間稱之為四公主歸綏叢談謂舊俗
相傳呼之為海蚌公主此皆未必可信或疑北郊府中有

靜宜堂匾額。師範學校今猶珍惜保存之。此靜宜二字。殆
 與公主之稱號有關歟。以上所輯皆公主軼事。得諸傳聞
 者。姑并錄之。俟續考。朔平府志阿附策倫敦篤。阿附當係
 額駙之訛。

